

ծած, տեղափոխում է նրան Պարսկաստան, ուր ապրում էր նա անյայտութեան մէջ, Որսորդի անուան ներքոյ: Իմ քեռի Պետրոսը ծպտեալ Որսորդի պատմութիւնը հասցրեց մինչեւ այստեղը, էլ ուրիշ ոչինչ չասաց: Բայց այժմ ծերունի քրդի պատմութիւնից երեւաց, որ նա կրկին յայտնուել է իր իսկական Մելիք-Միսաք անունով եւ, հայոց կամաւոր զօրքերի գլուխն անցած, կռուել է երկու քուրդ բռնապետների հետ, երկուսին էլ յաղթել է եւ, կալանաւորելով, յանձնել է Օսման փաշայի ձեռքը եւ իր «վրէժը» առել է: Ի՞նչ վրէժ: Երբ այդ մասին հարցրի, ծերունի քուրդը պատասխանեց.

— Բեդիր-խան-բեկը նոյն դաւաճանութեամբ վարոնեցաւ իր բարեկամ Մելիք-Միսաքի հետ, որպէս իր հօր եղբայր Խան-Մահմուդը՝ Միր-Մարտոյի հետ: Երկուսն էլ խաբէութեամբ ոչնչացրին իրանց լաւ դաշնակիցներին եւ տիրեցին նրանց բերդերին: Մելիք-Միսաքը Սասունի եւ Մոզաց երկրի իշխանն էր եւ լաւ բարեկամ Բեդիր-խան-բեկի հետ: Բայց այդ վերջինը այնքան ցած, այնքան վատ գտնուեցաւ, որ մի զիշեր անակնկալ կերպով յարձակուեցաւ նրա տան վրայ եւ բոլորին սրից անցկացրեց: Մելիքին նոյնպէս սպանած էին համարում, բայց տարիներից յետոյ կարծես գերեզմանից վերադարձաւ նա եւ իր վրէժը առեց...

Երկու հայ իշխաններ, մեկը՝ Ոստանի տերը, միւսը՝ Սասունի տերը, միեւնոյն ճակատագրական հարոաձքի տակ խորտակուել էին, երկուսն էլ ստոր դաւաճանութեան զոհ էին դարձել: Ասլանը, Երեւի, գիտեր այդ բոլորը. նա ոչինչ չէր խօսում, միայն լռութեամբ լսում էր ծերունի քրդի խոստովանութիւնը, որը, դառն փորձերից խրատուած, խօսում էր մեզ դառն ճշմարտութիւններ...

— Տեսնո՞ւմ ես, քրիւայ, — վերջապէս խօսեց Ասլանը, — դուք ձեր բարեկամներին ու դաշնակիցներին այդպէս վատութեամբ ոչնչացնելով՝ ինքներդ միայնակ ու անզօր մնացիք եւ դուք էլ ոչնչացաք: Դուք խաբէութեամբ տիրեցիք ձեր բարեկամների ամրոցներին, բայց ձեր ձեռքումն էլ չմնացին նրանք, եկաւ օսմանցին եւ խլեց ձեզանից: Եթէ դուք հաշտ մնայիք, դրանցից եւ ոչ մեկը չէր պատահի:

Ասլանը ծերունի քրդի, այդ անբախտացած ազնուականի, սրտիցն էր խօսում: Նրա վշտահար դէմքն ակելի մռայլուեցաւ, ակելի թախծալի կերպարանք ստացաւ:

— Ճշմարի՛տ է, շատ ճշմարի՛տ, — պատասխանեց նա տխուր ձայնով: — Մենք մեր ձեռքով մեր տունը քանդեցինք... Բայց ո՞վ կռուացրեց մեզ, ո՞վ բարեկամների ու դաշնակիցների մէջ երկպառակութիւն սերմանեց: Նոյնիսկ օսմանցին: Ես բոլորը չպատմեցի ձեզ, պարոն, թէ ինչպէս օսմանցի